

Сув хўжалиги вазирлиги: Олот ва Қоракўлда сув тошқини юз бериши эҳтимоли йўқ

Ўзбекистон Сув хўжалиги вазирлиги Олот ва Қоракўл туманлари Амударё ва Каспийнинг сувлари остида қолиши мумкинлиги ҳақидаги миш-мишларни рад этди.



Хозирги кунда Амударёда сув тошқини юз бериши эҳтимоли умуман мавжуд эмас. Бу ҳақда Ўзбекистон Сув хўжалиги вазирлиги матбуот хизмати Kun.uz'га маълум қилди.

Маълум қилинишича, Амударёнинг Ўзбекистон ҳудудига кириб келадиган нуқтасидаги Термиз сув ўлчаш постида ҳозирда сониясига ўртacha 1,3 минг метр куб сув оқиб ўтмоқда. Бу кўрсаткич ўртacha кўп йиллик меъёрга нисбатан уч-тўрт баравар кам.

Шунингдек, Амударёнинг Бухоро вилоятига сув олиш ҳудудида жойлашган Атамират сув ўлчаш постида ҳам бугунги кунда сониясига ўртacha 805 метр куб сув оқиб ўтаётган бўлиб, бу кўп йиллик меъёрга нисбатан тўрт бараварга камдир.

Амударёнинг асосий ирмоғи – Вахш дарёсида жойлашган Тожикистоннинг Нурек сув омбори умумий ҳажми 10,5 миллиард куб метр бўлиб, бугунги кунда мазкур сув омборида сув ҳажми бор-йўғи 6,2 миллиард куб метрни ташкил этади. Оддий қилиб айтганда, омборда сув захираси деярли қолмаган (сув омборининг ўлик сув ҳажми 6,0 миллиард куб метр).

Ўзбекистон сув хўжалиги вазири Шавкат Ҳамроев Амударёдаги сув ресурсларига боғлиқ вазиятни Тожикистон сув ва энергетика вазири Усмонали Усмонзода билан телефон орқали муҳокама қилган. Вазир Усмонзода Амударёда ҳеч қандай тошқин бўлиши мумкин эмаслиги, бунга бирор-бир омил йўқлигини таъкидлаган.

«Шундан кўриниб турибиди, Амударёда сув кўпайиши кузатилаётгани йўқ ва бунга ҳеч қандай сабаб ҳам мавжуд эмас», дейилади вазирлик ахборотида.

Бундан ташқари, Каспий денгизида сув тошқини бўлиб, Ўзбекистон ҳудудига, жумладан Бухоро вилоятининг Олот ва Қоракўл туманлари гача етиб келиши борасида тарқалган миш-мишлар мутлақо асоссизлиги қайд этилган.

Халқаро сатҳлар шкаласига (Болтиқ тизимиға) нисбатан Каспий денгизининг сув сатҳи 27 метр пастда, Олот ва Қоракўл туманларининг ер сатҳи эса ўртacha 190 метр юқорида жойлашган — Каспий денгизининг сув сатҳи Олот ва Қоракўл туманлари ер сатҳидан ўртacha 217 метр пастда ҳамда 950 километр узоқликда жойлашган.

«Сув хўжалиги вазирлиги халқимизга шуни катта ишонч билан таъкидлайдики, Амударёда, қолаверса, Олот ва Қоракўл туманларида ҳеч қандай сув тошқини кузатилмаяпти ва ҳозирги шароитда бунинг асло эҳтимоли ҳам мавжуд эмас», дейилади вазирлик маълумотида.

Эслатиб ўтамиз, 28 апрель кунига ўтар кечаси Бухоро вилояти ҳудудида кучли шамол юз бериши ортидан Олот ва Қоракўл тумани аҳолиси ўртасида сув тошқини юз бериши ҳақида миш-мишлар тарқалган ва одамлар ўз турар жойларини ташлаб қирликларга чиқиб кетиши [кузатилганди](#).

манба: www.kun.uz